

**EMAKUMEEN KONTRAKO INDARKERIAREN AURKAKO
NAZIOARTEKO EGUNERAKO ERAKUNDE ADIERAZPENEA**

Azaroaren 25a “Emakumeen kontrako indarkeriaren aurkako nazioarteko eguna” dela-eta, Jendarte Batzordeko kideok azpimarratu nahi dugu alor horretan behar-beharrezkoa dela politikari eta herritarren adostasunean eta konpromisoan sakontzea, eta hortik abiatuta, batera bizitzeko guneak sortzea, non emakumeek, azkenean, indarkeria matxistatik aske bizitzeko aukera izango duten. Gure ustez premiazkoa da helburu horrek lehentasunezko eta etengabeko tokia izatea bizitza kolektiboa antolatu eta kudeatzeko ardura duen edozein erakunde publikoren agenda politikoan.

Sexu-erasoetan nahi dugu arreta jarri, batez ere, neska gazteek jasaten dituztenetan. Tamalez maiz entzuten dugu:

“Hiru gaztek 17 urteko adingabe bat bortxatu dute Egia auzoan”, “neska gazte batek sexu-erasoa pairatu du Ibarrako jaietan”, “polemika San Ferminetan, sexu-erasoen gorakadaren ondorioz”, “Laudion gizon batek emaztea erail du”, “neska gazte batek sexu-erasoa pairatu du Irurako jaietatik etxera itzultzean” “emakume batek Urumea ibaira bota du bere burua, bikotekidearen heriotza-mehatxuetatik ihes egiteko” “Irunen emakume batek aiztoa sartu dio mutil-lagunari, haren erasoetatik defendatzeko”..

Indarkeria matxistaren alderik gordinena hori da, jendeak ikusten eta ezagutzen duena. Alabaina, indarkeria matxistak askotariko aurpegi eta adierazpenak dauzka, eta emakume guztiei eragiten die bizitza osoan zehar, gazteei, zaharrei, etorkinei, sexu-langileei, politikariei, bankariei edo superreko kutzazainei. Indarkeria matxista etxeetan nozitzen dute emakumeek, baina baita eremu publikoetan ere, mota eta intentsitate desberdineko hainbat portaera matxista eta bortitzen bitartez.

Ikuspegi horretatik begiratuta, eraso matxistak ez dira gizon gutxi batzuen jokabide soilak, emakumeen eta gizonen elkarrekiko bizitza antolatzeko eraikitako eredu baten parte baizik, emakumeei denbora kentzean eta emakumeen gorputza, afektuak eta lana gizonen zerbitzuan jartzean oinarritu dena. Eredu horrek berez legitimatzen du egoera hau, emakume eta gizonen arteko desberdintasunei esker, eta neurri handiagoan edo txikiagoan baimentzen du emakumeen aurkako indarkeria. Hain zuzen ere, desberdintasun-testuinguru

horretan sartu behar ditugu erasoak, izan ere, eraso horietako asko hain daude normalizatuta eta hain dira egunerokoak, neska gazteek nekez antzeman ditzaketela.

Normalizatzen diren hamaika faktore desberdintzaile identifika ditzakegu gure gizartean; nesken sexualizazio etengabea; emakumearen gorputza desira-objektu gisa ikustea; kontrola ezinezko sexualitatea duen gizonaren estereotipoa, bere ekintzen erantzukizun orotik salbuesten duena; edota jazarpenaren naturalizazioa, hurbilketa sexualeko estrategia gisa.

Egoera guzti horiek gainditzeko beharrezkoak dira prebentziorako estrategiak sustatzea, emakume gazte eta helduen jabetasuna sustatu behar luketen estrategiak.

Uste dugu indarkeria ez litzatekeela indarrean egongo indarkeria hori justifikatzen, legitimatzen eta ahalbidetzen duten gizarteratze-bitarteko jakin batzuk indarrean egongo ez balira. Izan ere, bitarteko horiek ahalbidetzen dute indarkeria, kontzienteki edo inkontzienteki, bidezkoztat, beharrezkoztat edo saihestezintzat jotzea. Ildo horretan, erlijioak, hizkerak, komunikabideak, familiak eta hezkuntzak zeresan handia dute indarkeria iraunarazten laguntzen duen gizarteratzean.

Horregatik guztiagatik Mutrikuko udalak konpromiso hauek hartzen ditu:

- Giza baliabideak eta baliabide ekonomikoak jarriz, berdintasunaren aldeko eta emakumeenganako indarkeriaren aurkako udal politikari heltzea (parte-hartzean oinarritutako prozesuak abian jarriz, emakumeen ahalduntzea sustatzeko eremu komunak sortuz, beste udalerrri batzuekin elkarlanean jarriz...)
- Indarkeriaren askotariko adierazpen eta toki ugarietara hedatzea gure begirada.
- Kultura-adierazpen eta -fenomeno diskriminatzaileen aurka lan egitea.
- Gure herriko ikastetxeetan, gazteek, errespetuan eta berdintasunean oinarritutako sexualitatea gara dezaten, hezkuntza afektibo-sexualean kooperatzea eta “Beldur Barik” hezkuntza programan parte har dezaten animatzea.

Azkenik GONBIT EGITEN DIEGU herritar guztiei, azaroaren 25ean, 19:00etan, elizako eskaileretan, egingo den elkarretaratzean parte hartzera.

